

Ўзбекистонда sog'liqni saqlash Здравоохранение Узбекистана



Газета 1995 йил октябрь ойидан чиқа бошлаган • www.uzssgz.t.uz, uzss@yandex.ru • 2019 йил 15 февраль • № 6 (1235)

Ўзбекистон Республикаси Президентининг ҚАРОРИ

2019-2025 йилларда ЎЗБЕКИСТОН РЕСПУБЛИКАСИ АҲОЛИСИНING РУҲИЙ САЛОМАТЛИГИНИ МУҲОФАЗА ҚИЛИШ ХИЗМАТИНИ РИВОЖЛАНТИРИШ КОНЦЕПЦИЯСИНИ ТАСДИҚЛАШ ТЎҒРИСИДА

Ўтган вақт мобайнида аҳолининг руҳий саломатлигини муҳофаза қилиш миллий хизматини такомиллаштириш, руҳий ҳолати бузилишидан азият чекувчи шахсларни аниқлаш, даволаш ва реабилитация қилиш бўйича соғлиқни сақлаш тизимининг барча даражаларида муайян ишлар амалга оширилди.

Ўзбекистон Республикаси Президентининг 2018 йил 16 мартдаги “Психиатрия ёрдами кўрсатиш тизимини тубдан такомиллаштириш чора-тадбирлари тўғрисида”ги ПҚ-3606-сон қарорига мувофиқ аҳолига психиатрия ёрдами кўрсатиш тизимини янада такомиллаштириш, психиатрия муассасаларини замонавий тиббиёт ускуналари билан жиҳозлаш (қўшимча жиҳозлаш), шунингдек, республика психиатрия муассасалари биноларини қуриш ва реконструкция қилиш дастурлари бажарилмоқда.

Жумладан, “психиатрия” йўналиши бўйича давлат грантлари асосида магистратурага қабул квоталари оширилди, олий тиббий таълим муассасаларининг психиатрия кафедраларида фундаментал, амалий ва инновацион илмий-тадқиқот ишлари фаоллашди. Илк бор руҳий хасталикларга ташхис қўйиш ва даволаш бўйича хусусий тиббиёт ташкилотлари томонидан кўрсатилган хизматлар рўйхати тасдиқланди.

Аҳолининг руҳий саломатлигини муҳофаза қилиш, сифатли психиатрия ёрдами кўрсатишни ташкил этиш, руҳий ҳолат бузилишининг олдини олиш, ташхис қўйиш ва даволаш тизимини янада ривожлантириш мақсадида:

1. Қуйидагилар:

2019-2025 йилларда Ўзбекистон Республикаси аҳолисининг руҳий саломатлигини муҳофаза қилиш хизматини ривожлантириш концепцияси (кейинги ўринларда – Концепция) 1-иловага мувофиқ;

2. Қуйидагилар **Концепциянинг асосий вазифалари этиб белгилансин:**

руҳий ҳолати бузилган шахслар манфаатлари йўлида маъмуриятчилик сифатини ошириш, психиатрия хизмати билан давлат ва нодавлат ташкилотлар ўртасида самарали ҳамкорлик тизимини шакллантириш;

аҳолига психиатрия ёрдами кўрсатиш тизимини инновацион ривожлантириш, руҳий хасталикларнинг олдини олиш, уларга ташхис қўйиш ва даволаш бўйича илғор технологияларни амалиётга жорий этиш, ушбу соҳадаги илғор хорижий тажрибани ўрганиш ва татбиқ этиш;

аҳолига психиатрия ёрдами кўрсатиш соҳасида хусусий тиббиёт амалиёти ривожланишини рағбатлантириш;

руҳий ҳолат бузилиши аломатларига эга бўлган инсонларга нисбатан салбий қарашларнинг шаклланиши ва уларнинг камситилишига йўл қўймаслик, руҳияти бузилган шахслар ҳуқуқлари, эркинликлари ва қонуний манфаатлари амалга оширилиши учун тенг шарт-шароитларни таъминлаш;

руҳий саломатликни муҳофаза қилиш масалаларида аҳолининг хабардорлик даражасини ошириш, руҳий ҳолати бузилган шахсларга нисбатан нотўғри тасаввурларга барҳам бериш;

ёрдамга муҳтож бўлган аҳолининг барча ёшдаги гуруҳларини психиатрия ёрдами билан қамраб олиш, руҳий ҳолати бузилган шахсларни аниқлаш, даволаш ва

реабилитация қилиш бўйича сифатли тиббий хизматлардан фойдаланиш имкониятларини ошириш;

аҳолининг руҳий саломатлигини муҳофаза қилиш соҳасидаги кадрлар салоҳиятини мустақамлаш;

психиатрия ёрдами кўрсатишда, айниқса, республика ҳудудларида идоралараро мультидисциплинар бригада иши моделини жорий этиш;

психиатрия ёрдами кўрсатувчи амалдаги муассасалар негизда фаол терапияга ва кенг қўламли даволаш-реабилитация комплекс тадбирлари ўтказишга, кундалик врачлар кузатувида бўлишга муҳтож бўлган, бироқ куну тун психиатрия стационарига жойлаштирилиши

(Давоми 2-бетда).

Юртимиз шифохоналарида

РЕСПУБЛИКА БОЛАЛАР ОРТОПЕДИЯ МАРКАЗИ ЭЪТИБОРДАН ЧЕТДА...МИ?

Маълумки, давлатимиз раҳбарининг 2018 йил 7 декабрда “Ўзбекистон Республикаси соғлиқни сақлаш тизимини тубдан такомиллаштириш бўйича комплекс чора-тадбирлар тўғрисида”ги 5590-сонли Фармони ва “Ўзбекистон Республикаси соғлиқни сақлаш вазирлиги фаолиятини ташкил этиш чора-тадбирлари тўғрисида”ги 4055-сонли қарори қабул қилинган эди. Мазкур меъёрий-ҳуқуқий ҳужжатларнинг ижросини таъминлаш, даволаш-профилактика муассасаларида сифатли ва тез тиббий хизмат кўрсатиш самарадорлигини янада ошириш, халқаро тажрибаларни ўрганиш, соҳага инвестициялар киритиш ва тиббиёт туризмини такомиллаштириш борасида эзгу фаолиятлар йўлга қўйилмоқда.

Хўш, Республика болалар ортопедия марказида бу борада қандай ишлар амалга оширилмоқда? Улар томонидан аҳолига сифатли ва ихтисослашган тиббий хизмат кўрсатиш учун етарли шарт-шароитлар яратилганми? Мазкур саволларга жавоб олиш мақсадида ушбу муассасада бўлиб, мутасаддилар билан суҳбатлашдик.

Марказда фаолият юритаётган соҳа ходимлари томонидан аҳоли, айниқса, болаларга ихтисослашган ортопедик хизмат

кўрсатиб келинмоқда. Айтиш жоизки, 150 ўринга эга ушбу муассасада 5 та бўлим мавжуд бўлиб, уларнинг ҳар бири 30 ўринга мўлжалланган. Жумладан, мактабгача ёшдаги болаларда 1-чаноқ-сон патологияси, умуртка поғонаси патологияси, мактаб ёшдаги болаларда 2-чаноқ-сон патологияси, нейроортопедия, қўл ва оёқ деформацияси бўлимларида фаолият юритадиган 30 нафардан зиёд шифокорлар томонидан болаларга сифатли тиббий ёрдам кўрсатилмоқда.

(Давоми 5-бетда).

